

兮流耿光將樂瑤池之宴集由喜玉京於壽昌降清問於
宣室討真經於柏梁乃因高為臺順時謀築披翳薈剪林
麓鏟重岡移峻谷量其遠近以議夫土功命彼般倬再度
其山木使人以悅無告於勞均力取材不遠而復屹九重
以初起憑一簣而始覆其為勢也嵒嵒皚皚粉壁光兮朱
門開若方丈與蓬萊其為麗也崢嶸郁煜星柱浮兮雲楣
肅狀靈光與景福有時鳴猿告曉貞松歛靄千峰轉日迎
秀色於瓊樓萬歲傳聲和幽音於地籟磅礴壓乎人境葩
芳聳乎天外玉喬飛舄見鳬影之翩翩神女窺窓聽鸞歌
之噦噦俯衆山兮如束縈八川兮如帶上方句晦宴息齋